

周
禮
正
義

周禮正義卷三十四

瑞安孫詒讓學

以凶禮哀邦國之憂哀謂救患分裁凶禮之別有五疏以凶禮哀邦國之憂者五禮之二也說文凶部云凶惡也釋名釋言語云凶空也就空凶也裁喪皆凶惡之事故哀弔之禮謂之凶禮注云哀謂救患分裁者裁注例用今字當作災下並同詳賸夫疏說文口部云哀閔也救患分裁據左僖元年邢遷于夷儀齊師宋師曹師城邢傳文彼以邢被狄伐諸侯救之與此後經禴恤事相類鄭以五凶禮通有救患分裁之義故據以爲釋云凶禮之別有五者目具下文以喪禮哀死亡哀謂親者服焉疏者含襚疏以喪禮哀死亡者說文哭部云喪亡也白虎通義崩

喪篇云喪者人也人死謂之喪何言其喪也人不可復得見也生者哀痛之亦稱喪禮曰喪服斬衰易曰不封不樹喪期無數孝經曰孝子之喪親也是施生者也鄭喪服注云不忍言死而言喪喪者棄也之辭若全存居於彼焉已也之耳 注云哀謂親者服焉疏者含饘者釋文云含本亦作哈案哈卽含之俗詳大宰疏賈疏云據上文云哀邦國之憂則此亦據諸侯邦國之內而言但天子諸侯絕傍期傍期已下無服若始封之君不臣諸父昆弟亦有服今云親焉服焉者鄭廣解哀義不專據天子諸侯之身也案士喪禮親者不將命注云大功已上有同財之義無歸含法鄭云親者服焉據大功親以上直有服無含法若小功已下有含并有服也若然此據大夫以下而說天子諸侯雖

無服其含禭則有之故春秋王使榮叔歸含且贈士喪禮君使人禭明天子諸侯於臣子皆有含禭也詒讓案諸侯雖絕傍期然諸侯於其諸父及兄弟之爲諸侯者則有服喪服傳云尊同則得服其親服義亦通於此也通典凶禮引譙周云諸侯降旁親旁親若爲諸侯及女子嫁於諸侯服如國人此卽鄭所謂親者服焉之義賈說未瞭含禭詳小宰疏以荒禮哀凶札荒人物有害也曲禮曰歲凶年穀不登君膳不祭肺馬不食穀馳道不除祭事不縣大夫不食梁士飲酒不樂札讀爲截截謂疫癘疏以荒禮哀凶札者遭凶札貶損振救之禮謂之荒禮若大司徒十二荒政及周書大匡糴匡二篇所紀是其略也 注云荒人物有害也者賈疏云經云荒以爲目下云凶札則荒中有凶是

物有害荒中兼有礼是人有害案司服云大札大荒則素服注云札投病荒飢饉者彼不以荒爲目以荒替凶處故彼注荒爲飢饉不爲物有害也引曲禮者鄭彼注云登成也皆爲自貶損憂民也禮食殺牲則祭先有虞氏以首夏后氏以心殷人以肝周人以肺不祭肺則不殺也不治道爲妨民取蔬食也縣樂器鍾磬之屬也梁加食也不樂去琴瑟此並遇荒自貶損之禮故引以爲證據小行人云國札喪則令購補之國凶荒則令購委之是常有購補之事注不具也云札讀爲截截謂疫癘者癘舊本作厲今據毛晉本校改膳夫注云大札疫癘也大司樂注亦作癘阮元云札者古文假借字也故注易其字作截截者斷也至字林乃有处字从攴也聲丁晏云札截聲相近釋名釋天札

截也氣傷人如有斷截也段玉裁云札字已屢見矣此乃云謂
爲截者互見也以弔禮哀禍裁禍裁謂遭水火宋大水魯莊公
使人弔焉曰天作淫雨害於衆盛如何不弔廋焚孔子拜鄉人
爲火來者拜之士一大夫再亦相弔之道疏以弔禮哀禍裁者
說文人部云弔問終也案弔之本義爲弔喪引申爲弔裁之通
語公羊昭二十五年何注云弔亡國曰唁弔死曰弔弔喪主曰
傷弔所執紼曰纒彼弔死以下三事並謂問終於此經當入喪
禮之科與此弔禮異也通言之五凶禮並得稱弔詳大府疏
注云禍裁謂遭水火者小行人注義同裁注例亦當作災宮正
注可證說文元部云禍害也又火部云天火曰裁水火皆爲人
之患害故通稱禍裁掌客禍裁殺禮注云禍災新有兵寇水火

也此下文別云以恤禮哀寇亂故注不兼兵寇也云宋大水魯莊公使人弔焉曰天作淫雨害於棗盛如何不弔者據左莊十一年傳文此引證弔水裁之事云殿焚孔子拜鄉人爲火來者拜之士一大夫再亦相弔之道者並據記文鄭彼注云言拜之者爲其來弔已此引證弔火裁之事以恤禮哀國敗同盟者合會財貨以更其所喪春秋襄三十年冬會于溜淵宋裁故是其類疏以恤禮哀國敗者賈疏云此經本不定若馬融以爲國敗正本多爲國敗謂其國見圍入而國被禍敗喪失財物若同盟之國會合財貨歸之以更其所喪也洪頤煊云小行人若國師役則令槁禴之字當作國敗鄭注不釋國字亦當作國敗包慎言云經下文以恤禮哀寇亂圍可包於寇亂之中此當從馬融

作國爲當案洪包說是也依賈說蓋唐時鄭注本亦有作國敗者與馬本正同賈大行人疏及蜀石經小行人注引此經並作國敗可證也國敗猶左哀十三年傳云國勝蓋據國爲敵所勝言之則曰國勝據國見敗於敵言之則曰國敗義實同也 注云同盟者合會財貨以更其所喪者謂贈之義猶言合會也贈會聲類同小行人槁贈注亦云使鄰國合會財貨以與之廣雅釋言云更償也賈疏云必知贈是會合財貨非會諸侯之兵救之者若會合兵當在軍禮之中故知此贈是會合財貨以濟之也故大行人云致贈以補諸侯之失小行人亦云若國師役則命槁贈之是其有財貨相補之驗詒讓案此贈與女祝大祝神仕庶氏諸職之贈文同而義異詳女祝疏云春秋襄三十年冬

會于澶淵宋裁故者春秋經文公羊傳云諸侯相聚而更宋之所喪曰死者不可復生爾財復矣穀梁傳云更宋之所喪財也此引以證會合財貨更其所喪之事也云是其類者澶淵之會爲宋火災雖非圍敗然歸財與禴禮事類相同故云是其類以恤禮哀寇亂恤憂也鄰國相憂兵作於外爲寇作於內爲亂疏注云恤憂也者爾雅釋詁文云鄰國相憂者賈疏云亦上云哀邦國之憂據諸侯爲說故鄭以鄰國解之哀之者既不損財物當遣使往諮問安不而已云兵作於外爲寇作於內爲亂者約左傳文七年魯叔仲惠伯語以賓禮親邦國親謂使之相親附賓禮之別有入疏以賓禮親邦國者五禮之三也說文貝部云賓所敬也賓客之禮主於敬故謂之賓禮注云親謂使之相

親附者謂舊本作者蓋涉後以飲食之禮親宗族兄弟章注而誤今據宋本正謂制朝聘之禮使諸侯親附王亦使諸侯自相親附也云賓禮之別有八者目亦具下文春見曰朝夏見曰宗秋見曰覲冬見曰遇時見曰會殷見曰同此六禮者以諸侯見王爲文六服之內四方以時分來或朝春或宗夏或覲秋或遇冬名殊禮異更遞而徧朝猶朝也欲其來之早宗尊也欲其尊王覲之言勤也欲其勤王之事遇偶也欲其若不期而俱至時見者言無常期諸侯有不順服者王將有征討之事則既朝覲王爲壇於國外合諸侯而命事焉春秋傳曰有事而會不協而盟是也殷猶眾也十二歲王如不巡守則六服盡朝朝禮既畢王亦爲壇合諸侯以命政焉所命之政如王巡守殷見四方四

時分來終歲則徧疏春見日朝夏見日宗秋見日覲冬見日遇者則歲時諸侯見王之異名也王制疏引五經異義云朝名公羊說諸侯四時見天子及相聘皆曰朝以朝時行禮卒而相逢於路曰遇古周禮說春日朝夏日宗秋日覲冬日遇許慎案禮有覲經詩曰韓侯入覲書曰江漢朝宗于海知有朝覲宗遇之禮從周禮說鄭駁之云此皆有似不爲古昔案覲禮曰諸侯前朝皆受舍于朝朝通名案異義相聘聘當爲朝不爲古昔義不可通疑當作不爲左背鄭意散文則朝覲不可通稱禮說與春秋說義不相違也云時見曰會殷見曰同者金鶚云會同之禮有四一是王將有征討會一方之諸侯時見曰會是也一是王不巡守四方諸侯皆會京師殷見曰同是也此二者皆行於境

內者也一是王巡守諸侯會於方岳書周官篇所謂王乃時巡諸侯各朝於方岳也禹會諸侯於塗山亦是巡守會同一是王不巡守而殷國諸侯畢會於近畿此二者皆行於境外者也時見時巡所見皆止一方諸侯殷見殷國曰會則四方六服諸侯畢至故曰殷會同對文則別散文則通同亦可言會會亦可言同總之皆曰會同諸侯亦曰會同林喬蔭云會同之禮掌舍云掌王之會同之舍設棧板再重設車宮轅門爲壇墻宮棘門爲帷宮設旌門無宮則共人門牛人云凡會同其其兵車之牛與其牽徬以載公任器縣師云若將有會同之戒則受法於司馬以作其眾庶及馬牛車輦會其車人之卒伍皆備旗鼓兵器以帥而至稍人云若有會同行役之事則以縣師之法作其同徒

輦輦帥而以至廩人云凡邦有會同則治其糧與其食遺人云凡會同掌其道路之委積大祝云大會同造於廟宜於社過大山川則用事焉反行舍奠大司馬云大會同則帥士庶子而掌其政令司士云凡會同作士從諸子云會同賓客作羣子從凡其扈從有官有兵其在道有次舍有委積其出入所經皆有告祭若如舊說會同皆在京師則諸侯來朝天子未嘗外出何以有此諸儀詒讓案會同禮蓋有常變不同鄭賈所釋並據常典言之故壇宮受玉不出郊甸若其變禮則多與巡守並行或在方岳或在東都如周公朝諸侯於東都之明堂宣王亦有東都之會詩小雅車攻云會同有繹是也其殷國則又或有侯國道里遠近不可豫定故六軍羣子從行而委積館舍之煩亦與大

師無異司馬法仁本篇云興甲兵以討不義巡守省方合諸侯
攻不同卽指巡守之會同而言也金氏所舉四者最爲詳析林
氏據掌舍諸職以明會同之不必皆在畿內亦足補鄭義耳詳
大行人疏 注云此六禮者以諸侯見王爲文者賈疏云案此
經文皆云見是下於上稱見故云諸侯見王爲文也秋官大行
人云春朝諸侯之等皆云朝覲諸侯是王下見諸侯爲文故彼
注云王見諸侯爲文二者相對爲文不同以彼是天子見諸侯
之義圖天下之事比邦國之功皆據天子爲主故以天子見諸
侯爲文此則諸侯依四時朝天子故以諸侯見天子爲文云六
服之內四方以時分來或朝春或宗夏或覲秋或遇冬者依大
行人文九州之外夷鎮蕃三服世一見無分年朝覲之法故專

據九州以內侯甸男采衛要六服言之四時分來謂六服每服各分四方每方又分四部依四時更迭而來也詩大雅韓奕篇韓侯入覲箋云諸侯秋見天子曰覲孔疏云駁異義云朝通名也秋之言覲據時所用禮是鄭意以韓侯秋來見王時行覲禮也下文奄受北國則韓侯是北方諸侯而得秋覲王者諸侯之朝天子四方時節其文不明說周禮者賈逵以爲一方四分之或朝春或覲秋或宗夏或遇冬藩屏之臣不可虛方俱行故分趣四時助祭也馬融以爲在東方者朝春在南方者宗夏在西方者覲秋在北方者遇冬是由經無正文故先儒爲此二說鄭於大宗伯依云六服之內四方以時分來或朝春或宗夏或覲秋或遇冬名殊禮異更迭而徧秋官大行人注云六服以其朝

歲四時分來更遞而偏二注並言分來則是從賈之說一方而
分爲四時也韓侯雖是北方諸侯其在北方爲西偏蓋於時分
之使當秋覲也若然明堂位注云魯在東方朝必以春似東方
諸侯皆朝春者正以彼記魯之祭禮云夏禘秋嘗冬蒸獨無春
祀明爲朝王闕之故云朝必以春魯在東方尤爲東偏蓋亦分
之使春朝故嘗闕春祭也案孔說是也大行人注云其朝貢之
歲四方各四分趨四時而來或朝春或宗夏或覲秋或遇冬依
彼注云四方各四分之則鄭意於六服之中分爲四方一方之
中又分爲四部以四時分來部近東者則朝春部近南者則宗
夏部近西者則覲秋部近北者則遇冬是東方亦可以秋覲西
方不必無春朝蓋與賈說共同賈疏釋四時分來謂春東方六

服當朝之歲盡來朝夏南秋西冬北皆然是則一方盡來無四分之事與韓奕疏引馬融說正同實非鄭怡又大行人賈疏謂馬氏之義六服當面各四分之假令東方侯服四分之東方朝春南方宗夏西方覲秋北方遇冬餘方皆然是馬季長亦主四方各四分趨四時而來之說則賈馬鄭三君義本不異與韓奕疏所述馬說不同未知孰得其實又公羊桓元年傳何注說五年一朝之制云分四方諸侯爲五部部有四輩輩主一時蓋謂於四方諸侯之中分爲五部部主一年五年而徧又於一部之中分爲四輩輩主一時四時而徧此則與經注之義並異不足取證者也陳汲謂朝覲不分方分時云以春來則曰朝以夏來則曰宗以秋來則曰覲以冬來則曰遇猶漢律春日朝秋日請

吳王濞春不朝使人爲秋請是也又書康生之誥大保率東方諸侯入應門左畢公率西方諸侯入應門右則是康王初卽位四方諸侯以朝適皆在京師也王與之說同金縢云諸侯朝覲經典並無分方分時之說蓋朝覲之年有定若東方諸侯春時或有故則至夏秋皆可朝苟必拘其時將廢朝乎案陳金說亦通但漢人說朝禮者並謂分方分時既無正文未敢輒易謹州其說於此其四時朝覲之月經注亦無文御覽禮儀部引白虎通云朝用何月呂以夏之孟四月因留助祭則謂以夏正四孟月詩周頌臣工箋云周之季春於夏爲孟春諸侯朝周之春故晚春遣之孔疏亦謂諸侯之朝皆用孟月與班義同也云名殊禮異者覲禮目錄云朝宗禮備覲遇禮省曲禮云天子當依而

立諸侯北面而見天子曰覲天子當宁而立諸公東面諸侯西面曰朝鄭注云諸侯春見曰朝受摯於朝受享於廟生氣文也秋見曰覲一受之於廟殺氣質也朝者謂於內朝而序進覲者位於廟門外而序人王南面立於依宁而受焉夏宗依春冬遇依春秋時齊侯唁魯昭公以遇禮相見取易略也孔疏引崔靈恩說朝宗之禮云諸侯春夏來朝各乘其命車至臯門外陳介也天子車賁在大門內傳辭既訖則乘車出大門下車王迎入至文王廟門天子還服朝服立於路門之外諸侯更易服朝服執贄而入應門而行禮故王當宁以待諸侯次第而進謂入應門諸公東面諸侯西面案以上並鄭據曲禮解朝覲名殊禮異春夏與秋冬不同之說六朝諸儒及唐人經疏說並略同然

鄭觀禮記注則云四時朝覲受之於廟是鄭亦有兩解公羊隱
十一年何注亦云禮朝受之於太廟不別朝覲之異與曲禮文
不同萬斯大凌廷堪並謂將覲之時或先行常朝之禮故有東
面西面之位金鶚又取鄭說云朝宗覲選特以時而異其名其
禮必不有異均是諸侯乃春夏來者覲以待之秋冬來者嚴以
接之果何義耶凡諸侯見天子無論何時皆謂之覲書言肆覲
東后於春時言之詩言韓侯入覲左傳言晉侯出入三覲郊特
牲言覲禮天子不下堂而見諸侯此皆諸侯見天子稱覲不必
在秋否則天子春夏皆下堂而見諸侯有是禮乎朝亦四時之
通稱不必在春然諸侯相見亦稱朝君臣每日常見亦稱朝惟
覲則專屬諸侯見天子不可混稱故覲禮一篇特名曰覲所以

別於常朝也鄭乃謂此諸侯秋見天子朝宗禮備覲遇禮省誤矣凡朝聘皆必受摯於廟者謙不敢當也必無受摯於朝之禮且諸侯奠摯必北面而此云東西面其非受摯甚明崔氏謂諸侯春夏乘命車天子出迎君臣皆服皮弁其謬尤甚下之朝覲天子必無迎賓之禮諸侯亦必無不乘墨車者也皮弁每日常朝之服乃諸侯初見天子受摯而以此服相接可乎竊謂諸侯以入廟行覲禮次日天子視朝諸侯又行朝禮蓋覲以正君臣之分故北面朝以通上下之情故東西面案蔣凌金三家並謂四時朝覲禮當不異足正鄭賈之誤曲禮所謂天子當依諸侯北面者與覲禮合自是朝覲宗遇之通禮而所謂天子當宁諸公東面諸侯西面者則於經無徵萬凌金並謂王每日常朝之

禮於義得通而萬凌謂先朝後覲金謂先覲後朝說又互異未能決定考司士常朝之位止云孤東面卿大夫西面無諸侯射人朝位與司士同而云諸侯在朝則皆北面朝士三詞外朝之位則五等諸侯並東面此皆與曲禮必不能強合者故江永以曲禮爲記人之異說黃以周亦謂覲禮同姓西面北上異姓東面北上是尙左也曲禮諸公東面諸侯西面則是尙右疑其爲異代禮聞疑載疑不敢曲爲傳合也云更遞而徧者謂一歲而當朝之服徧六歲而六服徧卽大行人注云六服以其朝歲四時分來更迭如此而徧是也云朝猶朝也欲其來之早者賈疏述注作朝之言朝也爾雅釋詁云朝早也是朝取來早之義也御覽禮儀部引白虎通云朝者見也因用朝時見故謂之朝說

與鄭小異云宗尊也欲其尊王者宗尊義詳目錄疏引白虎通云所以制朝聘之禮何所以尊君父重孝道也大臣之事君猶子之事父欲全臣子之恩一統尊君故必朝聘也是朝有尊君之義云觀之言勤也欲其勤王之事者觀勤聲類同說文見部云諸侯秋朝日觀勞王事鄭觀禮目錄云觀見也彼據字義此據聲訓義亦相成也云遇偶也欲其若不期而俱至者遇偶爾雅釋詁文春秋隱四年公及宋公遇于濇公羊傳云遇者何不期也一君出一君要之也此卽異義公羊說所謂卒而相逢於路曰遇者雖亦取不期之義而與冬見天子之禮迥異左傳隱四年孔疏引劉歆賈逵說並以彼亦用冬遇之禮則杜氏釋例已難之矣云時見者言無常期者謂有大事之時則來見

不依六服疏數之節及春秋朝覲之期也射義云狸首者樂會時也諸侯以樂會天子爲節左襄二十八年傳子產曰小適大共其貢職從其時命杜注云從朝會之命此時見義與彼同云諸侯有不順服者王將有征討之事則既朝覲王爲壇於國外合諸侯而命事焉者明時見亦先行朝覲常禮既朝覲乃行會禮但時會人眾必於國外爲壇與常朝在廟異也國外謂王城之外近郊爾雅釋詁云會合也故合諸侯謂之會禮詳司儀疏賈疏云此司儀及覲禮所云爲壇合諸侯是也又云既朝覲者若不當朝之歲則不須行朝覲於國中直壇朝而已其當朝之歲者則於國中朝案賈意蓋謂時見會當方六服諸侯其適當朝歲者則先朝於國復朝於壇其不當朝歲專爲時見而來者

周禮正義

禮三十四

十三

五百四十八

則無先朝國中之事觀禮疏亦同此說然依後注說殷同雖不當朝歲亦先朝國中復朝壇則此時見當方諸侯當朝歲與不當朝歲疑皆先行常朝之禮惟時見止合當方其當朝歲而不當征討之方者則不與命事之列或但朝國中不復更特見於壇耳賈說恐非鄭意又案時會殷同並先朝國中後朝於壇則有兩次將幣其致享及禮祿亦然故司儀經注說享及禮並於壇以五爵分爲二等是其說也命事謂命以征討之事卽大行人云時會以發四方之禁禁是九伐之法也論語先進皇疏云時見曰會亦隨其方若東方不服則命與東方諸侯共征之曲禮疏說亦與皇同又云朝覲王乃爲壇於國外與之會盟春於國東夏南秋西冬北會則隨事無有定期有時而然故曰時見

曰會也案依皇孔二說則時見亦分方會盟之壇隨四時而異
金弔云鄭不言一方諸侯文略也云春秋傳曰有事而會不協
而盟是也者左昭二年傳鄭子太叔語引以證時會卽爲有征
討之事云殷隨眾也者大宰注同曾子問云諸侯旅見天子注
云旅眾也殷旅義亦同云十二歲王如不巡守則六服盡朝朝
禮既畢王亦爲壇合諸侯以命政焉者大行人殷同注義同說
文曰部云同合會也賈疏云案大行人云十二歲王乃巡守殷
國若王無故則巡守王制及尙書所云者是也若王有故則此
云殷見曰同及大行人云殷國是也云殷同者六服眾皆同來
言殷國者眾來見於王國其事一也詒讓案十二歲侯甸男采
要五服皆當朝歲其衛服雖不當朝歲亦因王不巡守而來見

則六服當同先朝於廟後朝於壇其禮與時見大同但時見無常期殷見則必在十二年王不巡守時時見合當方諸侯殷見則六服四方萃於一年以此爲異耳殷見大行人謂之殷同至大行人又有殷國雖亦十二歲因王不徧巡守而行其禮然與殷見正禮迥異鄭賈說並未析詳職方氏及大行人疏云所命之政如王巡守者賈疏云巡守命政則王制所云命典禮考禮命市納價之類又尙書所云歲二月東巡守已下修五禮五玉及協時月正日之等皆是也云殷見四時四方分來終歲則徧者大行人注義同亦謂六服分爲四方每方又四分之四時分來與朝覲法同但朝覲各以其朝歲四時分來六服六歲乃徧殷同則皆於不巡守之年四時六服分來一歲則徧以此爲異

也賈疏謂與上同爲四方各總一時來王制疏亦云每當一時一方總來不四分也通典賓禮引崔靈恩說同並非鄭意時聘曰問股類曰視時聘者亦無常期天子有事乃聘之焉竟外之臣既非朝歲不敢漬爲小禮股類謂一服朝之歲以朝者少諸侯乃使卿以大禮眾聘焉一服朝在元年七年十一年疏時聘曰問股類曰視者經例凡視字並用古字作眡唯此獨從今字作視未詳其例賈疏云此二經者是諸侯遣臣聘問天子之事論讓案此經無聘視年數依注說聘無常期視則十二年三視王制云諸侯之於天子也比年一小聘三年一大聘五年一朝鄭彼注云此大聘及朝晉文霸時所制也蓋鄭意比年小聘五年大聘爲諸侯邦交之法聘義注據大行人歲問殷聘證小

聘大聘是也諸侯於天子則不用是法故王制注庶爲霸主所
制明非周公所制禮也而王制孔疏引五經異義春秋公羊說
及公羊桓元年何注則並依王制說說文見部亦云諸侯二年
大相聘曰親親視也視瞻也段玉裁謂許以周禮之親卽三年
大聘故大行人曰王之所以撫邦國諸侯者歲備存三歲備親
五歲備省省與視同間歲而舉所謂三年大聘下於上上於下
皆得曰親許說與周禮不相違也案段說亦得通但王制三年
大聘與此經殷親究不相應蓋五年一朝之文既與大行人不
合則聘年亦不足取證可知互詳大行人疏 注云時聘者亦
無常期者家上時見而言大行人注同云天子有事乃聘之爲
者大行人注云天子有事諸侯使大夫來聘天子無事則已是

也賈疏云上時是當方諸侯不順服其順服者當方盡朝無遣
臣來之法其餘三方諸侯不來諸侯聞天子有征伐之事則遣
大夫來問天子故云天子有事乃聘之焉云竟外之臣既非朝
歲不敢瀆爲小禮者賈疏云瀆數也天子無事不敢數遣大夫
聘問天子以是故有事乃遣大夫問也必知時聘遣大夫不使
卿者以其經稱問案聘禮小聘曰問使大夫此經云曰問明使
大夫也案小聘使大夫亦詳大行人疏云殷覲謂一服朝之歲
以朝者少者大行人注義同一服朝之歲謂惟有侯服來朝之
歲也曲禮孔疏云覲亦見也爲來見王起居故曰覲也案孔訓
覲爲見與許訓爲覲同覲亦作眺國語齊語云重爲之皮幣以
驟聘眺於諸侯覲眺聲類同云諸侯乃使驛以大禮眾聘焉者

此亦釋殷爲眾與殷見義同六服皆來聘故謂之眾賈疏云鄭知使卿以大禮者見聘禮大聘使卿此既諸侯使臣代已來明不得使大夫故知使卿以大禮眾聘焉使卿爲大禮對使大夫爲小禮也曲禮疏云殷覲亦並依時春東夏南秋西冬北各隨方送時但不每方分爲四耳所以殷覲不須分見四時者小禮不須更見四時法也云一服朝在元年七年十一年者此三年唯有侯服朝餘五服並不朝也賈疏云鄭約大行人要服之內諸侯服數來朝一服朝當此三年以其侯服年年朝甸服二年朝四年朝六年朝八年朝十年朝十二年朝從天子巡守是甸服於元年七年十一年無朝法是使卿殷覲也男服三年朝六年朝九年朝十二年從天子巡守於元年七年十一年亦無朝

法是亦使卿以大禮聘天子也采服四年朝八年朝十二年從天子巡守則元年七年十一年亦無朝天子之法是亦使卿以大禮聘天子也衛服五年朝十年朝則元年七年十一年亦無朝天子法是亦使卿以大禮聘天子也要服六年朝十二年從天子巡守則元年七年十一年亦無朝法是亦使卿以大禮聘也故知一服朝在元年七年十一年也以軍禮同邦國同謂威其不協僭差者軍禮之別有五疏以軍禮同邦國者五禮之四也夏官敘官注云軍眾名也軍旅田役皆興起徒眾故謂之軍禮注云同謂威其不協僭差者者爾雅釋詁云協和也左昭三年傳云不協而盟僭差者謂僭越差貸史記禮書云奢溢僭差威而同之所以和其爭競一其制度賈疏云既云同邦國則

周禮正義

禮三十四

十六

楚學子附本

五百四十五

使諸侯邦國和同故鄭云同謂威其不協僭差者使之和協不
僭差僭差謂若禮記郊特牲云宮縣白牡朱干設錫之類皆是
諸侯之僭禮也云軍禮之別有五者卽下大師大均大田大役
大封五者是也大師之禮用眾也用其義勇疏大師之禮用眾
也者大司馬注云大師王出征伐也賈疏云大師者謂天子六
軍諸侯大國三軍次國二軍小國一軍出征之法用眾 注云
用其義勇者謂因其義勇之志率勸而用之大均之禮恤眾也
均其地政地守地職之賦所以憂民疏大均之禮者校比戶口
以均平征賦之事事止於畿內賈疏謂此大均亦據邦國徧天
下皆均之非也邦國雖亦有大均之事然皆諸侯自主之非王
官所掌 注云均其地政地守地職之賦者賈疏云鄭約地官

均人云掌均地政均地守均地職彼注云政讀爲征謂地守地
職之稅也地守衡虞之屬地職農圃之屬若然地征者與下地
守地職爲目也此云之賦卽彼注之稅一也詒讓案均人云三
年大比則大均注云有年無年大平計之此主王國而言蓋欲
均地政地守地職之等須屬聚眾庶大平計其事故屬軍禮疏
謂諸侯僭濫無道賦稅不均則合眾以均之故在軍禮非也云
所以憂民者前注云恤憂也地政地守地職等不均則民病故
大均以憂恤之**大田之禮**簡眾也古者因田習兵閱其車徒之
數疏大田之禮者賈疏云此謂天子諸侯親自四時田獵案春
蒐夏苗秋獮冬狩通謂之田禮具大司馬職注云古者因田
習兵者小司徒注云田猶獵也大司馬注云兵者凶事不可空

設因蒐狩而習之左傳隱五年孔疏引白虎通云王者諸侯所以出獵者何爲田除害上以其宗廟下以簡集士眾也案習兵謂春振旅夏蒐舍秋治兵冬大閱皆因田而習之亦具大司馬職云閱其車徒之數者其釋文作眾小宰注云簡猶閱也公羊桓六年傳云大閱者何簡車徒也簡閱義同大役之禮任眾也築宮邑所以事民力強弱疏注云築宮邑者大司馬大役與處事注云大役築城邑也此宮謂王宮不云城者各舉一隅爲釋邑謂都邑築宮邑及匠人建國營國之事大興徒役亦以軍法部署之故屬軍禮也云所以事民力強弱者大司馬注云任猶事也事以其力之所堪謂因民力之強弱任之以立其功賈疏云論語云爲力不同科是事民力之強弱也大封之禮合眾也

正封疆溝塗之固所以合聚其民疏注云正封疆溝塗之固所以合聚其民者賈疏云知大封爲正封疆者謂若諸侯相侵境界民則隨地遷移者其民庶不得合聚今以兵而正之則其民合聚故云大封之禮合眾也鄭兼言溝塗者古境界皆有溝塗而樹之以爲阻固則封人云爲畿封而樹之者是也詒讓案大卜注云卜大封謂竟界侵削卜以兵征之若魯昭元年秋叔弓帥師疆鄆田是也左昭三十年傳云吳二公子奔楚楚子大封而定其從此云大封與土田定其所徙之居與此義同但據鄆大卜注則是大封者謂邦國疆界有侵越者當帥師以定之如左傳文元年云晉侯疆戚田襄八年云莒人伐我東鄙以疆鄆田皆正封疆而用師故屬軍禮經云合眾疑亦兼關軍旅之事

大卜注校此爲審當據以補其義溝塗卽五溝五涂見遂人司險職經注例皆作涂此作塗者涂之俗疑傳寫之誤詳小司徒疏又後經云王大封則先告后土彼疏以爲封建邦國蓋邦國初建容亦有封疆溝塗錯互不正當合軍以治之此經與彼事小異而實相因此疏與大卜注境界侵削之說則專據建國後言之耳以嘉禮親萬民嘉善也所以因人心所善者而爲之制嘉禮之別有六疏以嘉禮親萬民者五禮之五也賈疏云餘四禮皆云邦國獨此云萬民者餘四禮萬民所行者少故舉邦國而言此嘉禮六者萬民所行者多故舉萬民其實上下通也

注云嘉善也者爾雅釋詁文云所以因人心所善者而爲之制者謂飲食昏冠等禮並人心所嘉善者故順而制設其禮使相

親樂也賈疏謂設禮節以裁制之非鄭指云嘉禮之別有六者
卽下飲食昏冠賓射饗燕脰膾賀慶六者是也以飲食之禮親
宗族兄弟親者使之相親人君有食宗族飲酒之禮所以親之
也文王世子曰族食世降一等大傳曰繫之以姓而弗別綴之
以食而弗殊百世而昏姻不通者周道然也疏以飲食之禮親
宗族兄弟者此飲食賓射燕饗之禮皆宗族兄弟故舊朋友四
方之賓客所通有宰夫云凡賓客掌其飲食掌客云上公三食
侯伯再食子男壹食是四方賓客亦有飲食也射人小臣注以
賓射爲與來朝諸侯射是四方賓客亦有燕射也國語周語云
親戚宴饗則有殺烝又毛詩小雅伐木序云燕朋友故舊也是
宗族兄弟故舊朋友通有飲食饗燕之禮也經各舉一端互文

以見義耳賈疏云此經云飲食亦尊卑通有下文別有饗燕則經云飲者非饗燕是私飲酒法其食可以通燕食俱有以其下不別云食故也注云親者使之相親者前注義同云人君有食宗族飲酒之禮所以親之也者人君與宗族飲食之禮今亡蓋與燕禮及公食大夫禮略同王制孔疏引皇侃云食禮者有飯有酖雖設酒而不飲其禮以飯爲主故曰食也其禮有二種一是禮食故大行人云諸公食之禮有九舉及公食大夫禮之屬是也二是燕食者謂臣下自與賓客旦夕共食是也案人君以下族食蓋亦當用禮食故皇氏不數也飲酒者蓋謂族燕燕與飲酒亦通稱文王世子云若公與族燕則異姓爲賓膳宰爲主人公與父兄齒特牲饋食禮祝告利成徹庶羞設于西序下

注引尚書傳云宗室有事族人皆侍終日大宗已侍於賓奠然後燕私燕私者何也已而與族人飲也彼注又云白尸祝至於兄弟之庶羞宗子以與族人燕飲於堂內賓宗婦之庶羞主婦以燕飲於房毛詩小雅湛露傳云夜飲燕私也宗子將有事則族人皆侍不醉而出是不親也醉而不自是淫宗也鄭箋云夜飲之禮在宗室同姓諸侯則成之於異姓其議之則止依詩書傳義則天子四時祭及禘祫疑並有族燕之法國語周語云時宴不淫韋注云一時之閒必有燕禮宴燕字通蓋卽指時享後之燕言之其卿大夫以下則宗子主其禮又月令季冬命樂師大合吹而罷注云歲將終與族人大飲作樂於大寢以綴恩也王居明堂禮季冬命國爲酒以合三族君子說小人樂然則歲

終又有合族大飲於寢之禮不徒時祭矣引文王世子曰族食
世降一等者賈疏云鄭彼注云親者彌疏者稀假令親兄弟歲
四度從父昆弟歲三度從祖昆弟歲二度族昆弟歲一度是其
一世降一等又引大傳曰繫之以姓而弗別綴之以食而弗殊
百世而昏姻不通者周道然也者弗別釋文作不別今禮記作
弗鄭彼注云姓正姓也始祖爲正姓高祖爲庶姓繫之弗別若
今宗室屬籍也賈疏云引之者證此經以飲食相親之事鄭注
引文王世子據人君法引大傳據大夫士法則萬民亦有此飲
食之禮也以昏冠之禮親成男女親其恩成其性疏以昏冠之
禮親成男女者若士冠士昏禮是也天子諸侯昏禮亡其冠禮
惟大戴禮記有公冠篇卽諸侯之冠禮云公冠四加玄冕盧社

子四當爲三玄當爲袞字之誤依盧說則公冠亦止三加蓋始
加緇布冠玄端服再加皮弁三加袞冕也士冠禮賈疏則云公
冠四加者緇布冠皮弁爵弁後加玄冕天子亦四加後當加袞
冕矣家語冠頌篇王注冠義孔疏又謂天子當四加玄冕五加
袞冕與賈說不同案盧說公冠三加本不墳而玉藻說始冠緇
布冠白諸侯下達明不上達於天子爵弁於天子爲吉凶參半
之服則不宜列加服之數玄冕袞冕異服同冠又不可分爲兩
加王孔賈諸家之義亦並錯互難通未能定也賈疏云此一節
陳昏姻冠笄之事上句直言昏冠專據男而言亦有姻笄故下
句兼言男女也若然則昏姻之禮所以親男女使男女相親三
十之男二十之女配爲夫妻是也冠笄之禮所以成男女男二

十而冠女子許嫁十五而笄不許亦二十而笄皆責之以成人之禮也詒讓案男女必冠笄而後昏嫁二禮相因故以親成合言之注云親其恩者謂昏禮也哀公問云大昏既至晁而親迎親之也又昏義云降出御婦車而婿投綬御輪二周先俟於門外婦至婿揖婦以入共牢而食合卺而醕所以合體同尊卑以親之也親其恩言合其恩誼云成其性者謂冠禮也士冠禮士冠始加祝曰棄爾幼志順爾成德鄭彼注云旣冠爲成德又冠義云已冠而字之成人之道也成人之者將責成人禮焉也責成人禮焉者將責爲人子爲人弟爲人臣爲人少者之禮行焉白虎通義性情篇云性者生也成其性言成其生之德也以賓射之禮親故舊朋友射禮雖王亦立賓主也王之故舊朋友

爲世子時共在學者天子亦有友諸侯之義武王誓曰我友那
家君是也司寇職有議故之辟議賓之辟疏以賓射之禮親故
舊朋友者王與諸侯射於朝也鄉射記云惟君有射于國中賈
彼疏謂天子賓射在朝是也其禮亡蓋當與大射禮略同詳射
人疏賈疏云謂若射人王以六耦射三侯三獲三客五正是賓
射之侯也以此賓射之禮者謂行燕飲之禮乃與之射所以申
歡樂之情故云親故舊朋友也案射人所說乃大射禮彼注以
爲賓射非也賈疏亦沿其誤詳彼疏注云射禮王亦立賓主
也者賈疏云案大射禮以大夫爲賓主案此云王以賓射之禮
既行燕飲之禮明知王亦立賓主也云王之故舊朋友爲世子
時共在學者者賈疏云若據卽位爲王以後亦有以臣爲朋友

周禮正義

禮三十四

三
五百四十八

不得云故舊今云故舊朋友明據未爲王時案文王世子周公居攝成王與伯禽在學與學子同居又王制有王太子是爲世子時其在學者也云天子亦有友諸侯之義者欲見此賓射內兼有諸侯之賓小臣注云賓射與諸侯來朝者射是也云武王誓曰我友邦冢君是也者書牧誓文僞孔傳云同志爲友言同志滅紂又僞古文泰誓亦襲此文非鄭所見賈引泰誓爲釋非也賈疏云言此者欲見經云朋友亦含諸侯在其中案洛誥周公謂成王云孺子其朋彼以成王以臣爲朋友則此朋友之中可以兼之矣云司寇職有議故之辟議賓之辟者小司寇八辟之二彼注云故謂舊知賓謂所不臣者三恪二代之後與然則彼賓謂賓恪諸侯與故舊朋友義不相涉此牽連引之證天子

有友諸侯之義非謂此朋友專指三恪三代之後也以饗燕之
禮親四方之賓客賓客謂朝聘者疏以饗燕之禮親四方之賓
客者說文食部云饗鄉人飲酒也引申爲饗食賓客之饗又說
文口部云宴安也案燕飲正字當作宴經通借燕爲之燕卽今
燕禮是也饗又盛於燕故大行人注云饗設盛禮以飲賓也左
宣十六年傳云晉侯使士會平王室定王享之王曰王享有體
薦宴有折俎公當享卿當宴國語周語亦云王公立飫則有房
丞親戚宴饗則有嚴丞案左傳享亦卽饗假借字周語立飫亦
卽饗禮也其禮今亡互詳酒正疏注云賓客謂朝聘者者賓
謂來朝諸侯客謂其來聘卿大夫燕禮記有與四方之賓燕之
禮彼賓爲聘使司几筵國賓注亦兼朝聘賓客言之散文通也

賈疏云此經饗燕並言殊食於上者食無獻酢之法故別言於上與私飲同科此饗燕謂宰客云上公三饗二燕侯伯再饗再燕子男一饗一燕饗享大牢以飲賓獻依命數在廟行之燕者其牲徇一獻四舉旅降脫屣升坐無筭爵以酢爲度行之在寢此謂朝賓若聘客則皆一饗其燕與時賜無數是親四方賓客也陳壽祺云考儀禮聘禮曰公於賓壹食再饗燕與羞俛獻無常數賓介皆明日拜於朝上介壹食壹饗據此則聘賓再饗聘介壹饗王禮與侯禮宜同禮記聘義大戴禮朝事儀皆云壹食再饗燕與時賜所以厚重禮也賈疏謂聘客皆一饗失之以賑膳之禮親兄弟之國賑膳社稷宗廟之內以賜同姓之國同福祿也兄弟有共先王者魯定公十四年天王使石尚來歸賑疏

以脰膾之禮親兄弟之國者孔廣森云與以賀慶之禮親異姓之國互文異姓亦有脰膾其兄弟之國當有賀慶益可知矣且歸脰雖諸侯於異姓大夫通有之故子以膾俎不至去魯讀語記祭於公不宿肉案孔說是也公羊定十四年何注云禮諸侯朝天子助祭於宗廟然後受俎實亦通同異姓言之 注云脰

膾社稷宗廟之肉者說文无部云脰社肉盛以蜃故謂之脰天子所以親遠同姓春秋傳曰石尚來歸祿又炙部云饔宗廟火熟肉春秋傳曰天子有事饔焉以饔同姓諸侯案說文肉部無脰膾二字而別有脣字訓口而非此義此脰膾卽祿饔之俗量人又作饔疑當爲饔詳彼疏賈疏云鄭摠云脰膾社稷宗廟之肉分而言之則脰是社稷之肉膾是宗廟之肉是以左成十三

年公及諸侯朝王遂從劉康公成肅公會諸侯伐秦成子受脰
于社不敬注云脰宜社之內也盛以蜃器故曰脰劉子曰國之
大事在祀與戎祀有執脰戎有受脰注云脰祭肉又案巽義左
氏說脰社祭之肉盛之以蜃宗廟之肉名曰脰以此言之則宗
廟之肉曰脰社稷之肉曰脰之驗也而公羊穀梁皆云生居俎
上曰脰熟居俎上曰脰非鄒義耳對文脰爲社稷肉脰爲宗廟
肉其實宗廟社稷器皆飾用蜃蛤故掌蜃云祭祀共蜃器之蜃
注云飾祭器是其祭器皆飾以蜃也案賈說是也脰脰之義公
穀與左氏說不同公羊定十四年傳云脰者何俎實也脰曰脰
熟曰脰穀梁傳文略同此並謂脰脰爲脰熟異名無廟社之別
其左氏說則以脰爲祭社肉脰爲祭宗廟肉故閔二年傳梁餘

子養曰帥師者受命于廟受脤于社又襄二十二年傳鄭公孫僑曰公孫夏從寡君以朝于君見于嘗酎與執燔焉是並以脤燔爲廟社異名許鄭及國語晉語韋注漢書五行志服虔注並從其說惟昭十六年傳子產曰孔張爲廟大夫喪祭有職受脤歸脤傳無祭社之文杜注則云受脤謂君祭以肉賜大夫歸脤謂大夫祭歸肉於公皆社之戊祭也孔疏云先儒皆以脤爲祭社之肉劉炫以爲脤亦祭廟之肉以規杜氏今案脤膳對文則廟社有異散文祭廟亦通稱脤劉炫說不誤惠士奇亦云受脤歸脤似非指社杜預謂大夫祭社歸肉於公孔疏乃云大夫奉君命攝祭於社皆應說也大行人歸脤以交諸侯之福掌蜃祭社其蜃器亦非獨盛社肉則脤膳兼廟社互舉通稱審矣互詳

量人疏云以娶同姓之國者聘禮記云若兄弟之國則問夫人
注云兄弟謂同姓若昏姻甥舅有親者則兄弟之國亦兼有異
姓此昏姻甥舅別入下文異姓中故知惟據同姓諸姬之國也
云同福祿也者少牢饋食禮祝嘏王人云皇尸命工祝承致多
福無疆于女孝孫來女孝孫使女受祿于天宜稼于田是祭祀
本以受福祿於神今同姓諸侯與王同祖故以脈牖致之明與
彼同受此福祿也云兄弟有共先王者者釋同姓之國有稱兄
弟之義賈疏云謂若魯與周同承文王鄭與周同承厲王如此
之輩與周同立廟是共先王也此文雖主兄弟之國至於二王
後及異姓有大功者得與兄弟之國同故僖九年夏王使宰孔
賜齊侯昨曰天子有事于文武使孔賜伯舅昨注云昨臘肉周

禮以賑膳之禮親兄弟之國不以賜異姓敬齊侯比之賓客又
僖二十四年宋成公如楚還入于鄭鄭伯將享之間禮於皇武
子對曰宋先代之後也於周爲客天子有事膳焉有喪拜焉是
二王後及異姓有大功者亦得賑膳之賜是以大行人直言歸
賑以交諸侯之福王辨同姓異姓是亦容有非兄弟之國亦得
賑膳也云魯定公十四年天王使石尙來歸賑者春秋經文引
以證其先王之國有歸賑之事詳掌蜚疏以賀慶之禮親異姓
之國異姓王昏姻甥舅疏以賀慶之禮親異姓之國者廣雅釋
詁云賀喜也說文貝部云賀以禮相奉慶也又心部云慶行賀
人也月令注云慶謂休其善也賈疏云言賀慶者謂諸侯之國
有喜可賀可慶之事王使人往以物賀慶之可施及異姓之國

所以親之也雖主異姓其同姓有慶賀可知故舉異姓包同姓也是以大行人云賀慶以贊諸侯之喜不別同姓異姓則兼同姓可知 注云異姓王昏姻甥舅者爾雅釋親云婿之父爲姻婦之父爲婚婦之父母婿之父母相謂爲婚姻婦之黨爲婚兄弟婿之黨爲姻兄弟又云母之兄弟爲舅母之從父兄弟爲從舅謂我舅者吾謂之甥也又云妻之父爲外舅郭注云謂我舅者吾謂之甥然則亦宜呼婿爲甥孟子曰帝館甥於貳室是也賈疏云若據男女身則男曰昏女曰姻若以親言之則女之父曰昏婿之父曰姻言甥舅者嫁女與之則爲甥王娶女來則爲舅總是昏姻之國也以九儀之命正邦國之位每命異儀貴賤之位乃正春秋傳曰名位不同禮亦異數疏以九儀之命正邦

國之位者此與大小行人爲官聯也大行人云以九儀辨諸侯之命等諸臣之爵注云九儀謂命者五公侯伯子男也爵者四孤卿大夫士也此九儀與彼略同但彼專據侯國賓客之禮此則通該內外諸臣諸侯言之所包尤廣也此亦卽小宰所云聽祿位以禮命先鄭彼注云禮命九賜也後鄭不從曲禮孔疏云案含文嘉九賜一日車馬二日衣服三日樂則四日朱戶五日納陛六日虎賁七日斧鉞八日弓矢九日拒鬯鄭司農以周禮九命與九賜是一也康成以九命與九賜不同九賜謂八命作牧九命作伯之後始加九賜異義許慎說九賜九命鄭康成以爲不同案依孔引異義則許與先鄭義同今攷九命與九賜迥不相涉兩漢諸儒或合爲一漢書王莽傳張純等曰謹以六藝

通義經文所見周官禮記宜於今者爲九命之錫顏注引張晏云周禮上公九命九命九錫也是西漢時已有是說卽許君所本公羊莊元年何注亦以九錫說九命穀梁莊元年楊疏序其非是至先鄭雖以九賜說禮命而此職注絕無一語涉九賜者其說與許何諸家蓋又小異互詳小宰疏注云每命異儀貴賤之位乃正者若典命九命禮儀以九爲節七命禮儀以七爲節五命禮儀以五爲節各依命數爲差所以正貴賤之位次使不淆混差僭也引春秋傳曰名位不同禮亦異數者左莊十八年傳文彼上文云王命諸侯故引以證每命異儀明彼云禮卽此經九儀也**壹命受職**始見命爲正吏謂列國之士於子男爲大夫王之下士亦一命鄭司農云受職治職事疏壹命受職者

職與爵相兼故曲禮注云凡仕者一命而受爵通典職官云周禮爵及命士故云一命而受爵有受爵有受命者命必有職故周禮云一命受職明一命之士職爵俱有也一命而受職再命不言自明耳案杜說是也此經自一命至九命咸上得兼下下不得僭上皆宗伯正之注云始見命爲正吏者賈疏云對府史胥徒非正吏以其府史胥徒皆官長所自辟除未得王之命故以士得王命者爲正吏也案賈謂正吏對府史胥徒者蓋據御僕小司寇朝士注並以羣吏爲府史實則此注當對不命之士而言若大宰達吏注云小吏則通命士及不命之士言之不盡正吏也云謂列國之士者賈疏云謂公侯伯爲列國下云七命賜國鄭注孝經云列土封疆謂之諸侯亦據公侯伯七命賜

國則子男不得爲列國也典命公侯伯之士一命故鄭以列國之士解之也云於子男爲大夫者賈疏云典命子男大夫一命是也云王之下士亦一命者凡經例積案數皆作壹注例用今字通作一詳酒正疏典命無王朝士命數但王之大夫四命以次差之則三命二命一命宜爲上中下士也鄭此及下注皆先舉侯國之臣次及王臣者欲先見卿大夫而後及士也賈疏謂以上云正邦國之位故以諸侯爲首以王臣亦之非鄭指也鄭司農云受職治職事者謂始受王之官職治其所掌之事也先鄭義與後鄭略同但以此一命爲王之中下士與後鄭異再命受服鄭司農云受服受祭衣服爲上士立謂此受立冕之服列國之大夫再命於子男爲卿卿大夫自立冕而下如孤之服王

之中士亦再命則爵弁服疏再命受服者通典職官云再命受服於君不自爲也然則一命者其服自爲也注鄭司農云受服受祭衣服爲上士者賈疏云祭衣服雖不指斥服名以義推之先鄭云爲上士則服爵弁服也此言再命爲上士則王之中士下士同一命可知也詒讓案受祭衣服謂受助祭於君之服亦卽錫爵時所受命服曾子問云天子賜諸侯大夫冕弁服於大廟是也蓋命服必受於君乃得有之故禮運以冕弁藏於私家爲非禮明未受命及黜退者不得有也其自祭及朝服則自作之故國語魯語云命婦成祭服列士之妻加之以朝服詩周南葛覃毛傳亦云孔疏云大夫助祭服玄冕受之於君故大宗伯再命受服是也妻所成者自祭之服少牢禮朝服玄冠緇布

衣素裳韋昭云祭服玄衣纁裳謂作玄冕之服非也又月令孟夏后妃獻繭乃收繭稅注云收繭稅者外命婦雖就公桑蠶室而蠶其夫亦當有祭服以助祭孔疏引皇氏云外命婦既就公家之桑而養蠶惟稅其繭餘得自入以其夫當有祭服以助王祭故令繭得自入以供造也孔氏謂夫助祭之服當公家所爲故禮再命受服所以有繭稅者以其夫亦當有祭服官家所給故輸繭稅以供造之案依皇侃說則助祭服外命婦自作孔則謂外命婦入稅於公官以其絲織作祭服還以授卿大夫士其妻不自織二說不同孔氏爲允云玄謂此受玄冕之服者以玄冕爲諸侯卿大夫之上服助祭服之明此再命受服皆據受上服言也云列國之大夫再命於子男爲卿者並據典命爲說此

列國亦專指公侯伯故別出子男也云卿大夫自玄冕而下如孤之服者賈疏云此亦據司服之文案玉藻注云諸侯之臣皆分爲三等其妻以次受此服則公之有孤之國孤絺冕卿大夫同玄冕若無孤之國則公侯伯子男卿絺冕大夫玄冕士皆弁弁若然此注云於子男爲卿卿當絺冕矣鄭云卿大夫自玄冕而下如孤之服者據司服之成文而言也案賈據玉藻注謂鄭意無孤之國卿不與大夫同玄冕大戴禮記諸侯遷廟篇盧注糾鄭之誤謂卿大夫同玄冕不以有孤無孤而異其說甚允竊謂此注直引典命文無分別無孤國卿服之義疑鄭君自易其說與玉藻注不必同也互詳內司服司服疏云王之中士亦再命者亦典命無文以次推之也云則齋弁服者賈疏述注則上

周禮正義

禮三十四

三百一 楚與子社本

五百四十八

有士字云凡言士者無問天子士諸侯士則皆爵弁以助祭也若然司服不見爵弁者以其王吉服有九自公以下轉相如其爵弁於天子諸侯非吉所用故不言案士冠禮皆有爵弁服是士之助祭服故士以爵弁爲正也任大椿云卿大夫以玄冕爲命服爵弁以下其次也士以爵弁爲命服皮弁以下其次也大宗伯注謂大夫玄冕七爵弁蓋專以大夫士之上服爲命服也次服所施等殺或旤乎命數如天子大夫四命則以爵弁家祭諸侯大夫再命則以朝服家祭以爵弁朝服皆大夫次服故也若命服高下則惟旤乎爵不旤命數如天子之士惟三命與諸侯之卿同而三命之士惟得爵弁子男之大夫一命與天子之下士同而一命之大夫得服玄冕於此見命服從爵不從命數

大夫士命服惟助祭得服之雖朝朔及家祭皆用命服之次又
云據注則再命受服兼含上受齊弁服但攷玉藻一命緼黼幽
衡注謂公侯伯之士一命疏謂緼黼當齊弁韎韐大宗伯疏謂
無間天子士諸侯士例皆齊弁以助祭據此則諸侯之上士一
命天子之下士一命皆得服齊弁矣又何待再命之士也今攷
月令疏謂禮再命受服其夫亦當有祭服官家所給故輪繭稅
以供造之然則齊弁郊廟之服必再命之士乃得受其一命之
士雖得服齊弁不得受服內司服凡命婦供其衣服注臣之命
者再命以上受服則下士之妻不共也然則不受服者公家不
供其服非不得服也案任述注義深得鄭指依鄭此注及士冠
禮注詩周頌絲衣箋說是天子及五等諸侯之士命數不同皆

以爵弁爲上服則雖三命上士亦不得服冕而禮器說冕旒云士三是士有服冕矣鄭彼注以爲夏殷禮殊無塙證鄭鑄陸佃並謂天子上士三命玄冕鍾文烝黃以周說同王昭禹孫希旦則謂天子中士再命亦玄冕吳廷華孔廣森金鑄則謂天子上中下士並得服玄冕以尊卑之等論之王臣陪臣服有隆殺而士獨一同爵弁非其差也說苑修文篇云士服黻此與玄冕一章之服適合但上士三命服章視命數則宜得有希冕三章之服是又不止玄冕矣若然王臣命服蓋不以爵爲別異而兼以命爲差次弁師諸侯及孤卿大夫之冕各以其等爲之言冕之等不及士司服士服白皮弁而下如大夫之服及士冠禮士以爵弁爲三加之尊服並專據侯國之制不得以擬天子之士也

說文曰部二云冕大夫以上冠荀子富國篇及大略篇皆云大夫
裨冕白虎通義緯冕篇云諸侯九旒大夫七旒士青弁無旒言
冕皆不及士者以唯天子士乃得服冕不服冕者多亦容諱侯
國制言之也互詳典命司服疏三命受位鄭司農云受下大夫
之位玄謂此列國之卿始有列位於王爲王之臣也王之上士
亦三命疏注鄭司農云受下大夫之位者賈疏云先鄭意以上
士二命下大夫三命上大夫四命案王制云次國之下卿位當
大國之上大夫小國之下卿位當大國之下大夫則諸侯之五
大夫有上下案序官有中大夫下大夫則中大夫亦得名爲上
大夫矣故先鄭以下大夫三命上大夫四命卽典命大夫四命
者是上大夫也後鄭不從者以侯伯子男名位不同侯伯猶同

周禮正義

禮三十四

三

卷之四十九

七命子男猶同五命況中大夫下大夫名位既同何嫌不得同命也是以典命唯見大夫四命是兼中下大夫故不從先鄭也云玄謂此列國之卿始有列位於王爲王之臣也者典命云公之卿三命侯伯之卿亦如之子男之卿再命此云列國之卿卽指公侯伯之卿也左成二年傳說晉鞏朔未有職司於王室杜注云非命贈名位不達於王室是命卿以上乃受位於王也賈疏云諸侯之卿大夫皆得聘天子今於三命乃云始有列位於王爲王之臣者以其再命已下卑雖得聘天子不得言位於王朝是據列國之卿而言故曲禮云列國之大夫入天子之國曰某士注引春秋晉士起亦據晉國之卿三命而於天子稱士與天子三命之士同稱士卽爲王臣也詒讓案依此注說則小國

之卿再命未得受位卽不命於天子故王制云小國二卿皆命於其君而白虎通義封公侯篇引王度記則云小國三卿一卿命於天子王制注依其說謂彼記文似誤脫是鄭謂小國亦三卿一卿命於天子今攷典命注引王制依其元文絕無改易以相參證疑此注義乃鄭君後定與王制注說自不同也黃以周云王制二當作三小國三卿皆命於其君不列位於天子王制所言命於天子皆謂受位於王國大宗伯三命受位子男之卿再命未受位於王二卿固命於其君一卿亦非命於天子也列國之大夫必受位於天子而後可謂之卿其未受位者於其國雖曰卿其實大夫也故晏子曰惟卿爲大夫小國三卿皆未受位於天子故叔孫穆子曰諸侯有卿無軍自伯子男有大夫無

卿韋注國語有卿有命卿也案黃說亦通但此注依典命侯伯之卿同四命爲已受位而魯語謂伯無卿下同子男則與此經義究不合古籍岐互未能決定也云王之上士亦三命者上注以王之下士一命中士再命以次推之則王之上士當三命與外國之卿同故詩鄭風褰裳箋云大國之卿當天子之上士是也四命受器鄭司農云受祭器爲上大夫立謂此公之孤始得有祭器者也禮運曰大夫具官祭器不假聲樂皆具非禮也王之下大夫亦四命疏注鄭司農云受祭器爲上大夫者鄉師注云祭器者簠簋鼎俎之屬先鄭以器爲祭器與後鄭說同而云爲上大夫者先鄭上注以王之下大夫三命差而上之則四命者當爲上大夫與後鄭說中下大夫同四命異也沈夢蘭云上

大夫卽序官中大夫康成謂中下大夫皆四命按司士大夫以其等族掛中下大夫不同等非皆四命可知先鄭是也案沈申先鄭說亦通云玄謂此公之孤始得有祭器者也者與命云公之孤四命通典職官云謂公之孤卿受祭器於公四命始受器三命以下皆自爲之也賈疏云曲禮云大夫有田首先爲祭服後爲祭器則儀禮少年用成牲皆是有地大夫則自得造祭器今云公之孤四命始得有祭器者但未四命已前有地大夫雖得造祭器祭器未具猶假之使足至四命卽具有言始有祭器者據始得具祭器而言案受器義與受服同蓋器之大者受之於官其小者則自造之杜說最允但受器者受大造小則無不具矣未受器者唯得自造小器而大器不具是具器卽受器猶

之六命賜官而後得具官賈疏與杜義亦足相輔也引禮運者鄭以彼云大夫卽指侯國卿大夫三命以下者而言明未受器者器既不具則須假不假而自具則爲非禮故曲禮云無田祿者不設祭器有田祿者先爲祭服鄭注云祭器可假祭服宜自有孔疏云若大夫及士有田祿者乃得造器猶不具唯天子大夫四命以上者得備具若諸侯大夫非四命無田祿則不得造故禮運云大夫祭器不假非禮也據諸侯大夫言之也熊氏以禮運據天子大夫得造不得具非也又王制大夫祭器不假孔疏引皇侃云此謂有地大夫故祭器不假若無地大夫則當假之禮運謂無地大夫也案孔說足申鄭義云王之下大夫亦四命者典命云王之大大夫四命注云四命中下大夫然則王之中

大夫亦四命此及下注止云下大夫者文不具也五命賜則鄭司農云則者法也出爲子男玄謂則地未成國之名王之下大夫四命出封加一等五命賜之以方百里二百里之地者方三百里以上爲成國王莽時以二十五成爲則方五十里合今俗說子男之地獨劉子駿等識古有此制焉疏注鄭司農云則者法也者大宰注義同先鄭之意蓋謂此賜則與大司馬九法均守平則以安邦國義同謂賜以土地并受任土之法楚辭天問云地方九則王注云謂九州之地凡有九品漢書敘傳云坤作陸執高下九則顏注引劉德云九則九州土田上中下九等也大司徒土均之法有九等則卽均平差等之法矣云出爲子男者據典命云子男五命又云子之大夫四命及其出封加一等是

也云立謂則地未成國之名者賈疏云對下文七命賜國是成國則五命子男言則是未成國但成國之賦有三若以出軍言之春秋襄公傳云成國不過半天子之軍謂據公五百里而言以其侯伯爲次國二軍故也若以執圭爲成國而言可及伯卽下經七命賜國者是也若以千乘爲成國言之惟公及侯以其伯三百里不得出千乘故鄭注論語云公侯之封乃能容之是也詒讓案王制注云方五百里者謂之大國方四百里方三百里者謂之次國方二百里及方百里者謂之小國然則男方百里以上已得爲國故典命大行人以子男爲小國之君此注謂侯以上乃成國者以下文七命賜國及左傳成國半天子之軍諸文參互定之故與彼異云王之下大夫四命出封加一等五

有侯無伯注何得通言侯伯乎況此注上云賜以方百里二百里之地與先鄭所云出爲子男義正同方百里卽男之地二百里卽子之地大夫四命出封賜地止得爲五命之子男若三百里則伯之地乃六命卿所封下文七命受國二鄭注說甚明段如孔本兼賜三百里之地是大夫五命受則得受七命伯之地非其次也與命後鄭注說出封加等亦云大夫爲子男卿爲侯伯不云大夫得爲伯孔所據本疑謬與此經注義並不合詩大雅板孔疏亦謂此注以伯以上爲成國與左傳疏不同而又據左傳成國不過半天子之軍及明堂位注成國之賦千乘諸文謂侯地四百里以上始爲成國伯未成國說亦歧互不足據也云王莽時以二十五成爲則方五十里者以莽制五十里爲制

雖與大司徒子男之地不合而子男賜則其名則同故引以爲證惠棟云王莽傳云諸公一同有眾萬戶土方百里侯伯一國眾戶五千土方七十里子男一則眾戶二千有五百土方五十里附城大者食邑九成眾戶九百土方二十里自九以下降殺以兩至於一成五差備具合當一則案十里爲成成百戶故方百里爲萬戶方七十里爲四千九百戶言五千舉成數也方五十里爲二千五百戶皆與王制合附城猶周之附庸自九成至一成降差以兩五差計之合一則二十五成之數云合今俗說子男之地者賈疏云時有孟子張包周及何休等並不信周禮有五百里已下之國以王制百里七十里五十里等爲周法故鄭指此等人爲俗說也詒讓案鄭意則爲子男受地之名而所

受地數自據大司徒子二百里男百里爲正王制謂子男同五
十里鄭以爲殷制故斥謂周子男五十里者爲俗說卽大司徒
先鄭注所云今五經家說也辨制子男地止二十五成合於俗
說而子男受則正合此經義足互證也詳大司徒疏云獨劉子
駁等識古有此制焉者賈疏云劉子駁等則有馬融鄭司農杜
子春等皆信周禮有五百里已下之國周公太平制禮所定法
故云識古有此制也引此諸文者證時有解則爲五十里者故
也案據後鄭說蓋劉歆等知周有五百里以下之國又知此經
一則有百里二百里之制辨制兼采俗說蓋與歆等不同先鄭
未據辨制則亦同而異也賈說未析六命賜官鄭司農云子男
入爲卿治一官也玄謂此王六命之卿賜官者使得自置其官

治家邑如諸侯春秋襄十八年冬晉侯以諸侯圍齊荀偃爲君
禱河既陳齊侯之罪而曰曾臣彪將率諸侯以討焉其官臣偃
實先後之疏注鄭司農云子男入爲卿治一官也者先鄭意此
賜官與前壹命受職義略同謂爲六官之卿治其當官之事賈
疏云案典命唯有出封加一等無入加之文則出有加入無加
今以子男五命入加一等爲王朝六命卿於理不可故後鄭不
從也先鄭之義出加入亦加若毛君之義出加入減故晉詩云
豈曰無衣六兮毛傳云天子之卿六命車旌衣服以六爲節是
出加入減也後鄭不從者諸侯入爲王卿大夫其尊如故以爲
榮何得入則減之乎指如鄭武公桓公並入爲王之司徒詩人
美之若減何美之有乎明入不減鄭君之義出加入不減依於

在國若言六兮者以晉侯入爲王卿謀不敢必當七命之服故云六兮耳詒讓案依無衣詩文似王朝卿大夫自有六章之服詳典命疏云立謂此王六命之卿者據典命文云賜官者使得自置其臣治家邑如諸侯者此破先鄭子男爲卿治一官之說說文一部云官吏事君也家臣亦事其主若君故謂之官賈疏云案載師有小都大都大都謂三公王子母弟所食邑小都王之卿六命所食邑如此六命已上賜之官使得自置其臣治家邑如諸侯此則大宰云施則於都鄙建其長立其兩已下是三公王子母弟得立官如畿外諸侯但少一卿不足於諸侯而已言家邑雖與大夫家邑同名此則大都小都也卿大夫稱家故言家邑以表大小都耳案公卿采邑有兩卿五大夫等詳大宰

疏此賜官卽所謂具官也禮運云大夫具官非禮也蓋王朝三公采邑得立二卿五大夫卿采邑得立二大夫五士皆具立兩設伍之制所謂具官也若大夫家邑雖亦有設官屬然不得具兩伍之數故此經六命卿而後賜官諸侯之卿仍不得具官故論語入佾篇孔子以管仲官事不攝爲非儉蓋侯伯之卿與天子大夫同禮運以大夫具官爲非禮卽指諸侯卿大夫言之也引春秋襄十八年冬晉侯以諸侯圍齊荀偃爲君禱河旣陳齊侯之罪而曰晉臣彪將率諸侯以討焉其官臣偃實先後之者左傳文彼文云晉侯伐齊將濟河中行獻子以朱絲係玉二穀而禱曰齊環怙恃其險負其眾庶棄好背盟陵虐神王曾臣彪將率諸侯以討焉其官臣偃實先後之杜注云彪晉平公名曾

臣猶未臣官臣守官之臣賈疏云引春秋者證諸侯以臣爲官故荀偃自於晉侯稱官畿內諸侯臣亦稱官此經是也七命賜國王之卿六命出封加一等者鄭司農云出就侯伯之國疏注云王之卿六命出封加一等者者據典命文鄭司農云出就侯伯之國者據典命云侯伯七命以侯伯始爲成國對上五命賜則爲出就子男未成國也八命作牧謂侯伯有功德者加命得專征伐於諸侯鄭司農云一州之牧王之三公亦入命疏注云謂侯伯有功德者加命得專征伐於諸侯者大宰云乃施典於邦國而建其牧注云以侯伯有功德者加命作州長謂之牧是也荀悅申鑒時事篇云古諸侯建家國世位權柄存焉於是置諸侯之賢者以爲牧總其紀綱而已不統其政不御其民賈疏

云侯伯七命今云八命作牧明是侯伯加命也得專征伐者案王制云諸侯賜弓矢然後專征伐並據州牧而言以其弓矢之賜州內有臣殺君子殺父不請於天子得專征伐之論讓案鄭言得專征伐於諸侯者謂得專征當州諸侯欲見不得征五侯九伯也此州牧亦通稱州伯詳後疏詩豳風伯兮孔疏引鄭荅臨碩引公羊桓五年傳云其言從王伐鄭何從王正也言諸侯不得專征伐有從天子及伯者之禮案據鄭荅周禮難義則七命以下諸侯亦得從征伐但不得專耳鄭司農云一州之牧者謂牧爲一州之長九州則牧有九人亦詳大宰疏云王之三公亦八命者據典命文王之三公不得作牧但命數同耳九命作伯上公有功德者加命爲二伯得征五侯九伯者鄭司農云長

周禮正義

禮三十四

四十一 楚學子社本

五百四十九

諸侯爲方伯

疏

注云上公有功德者加命爲二伯者上公卽三

公也典命云上公九命爲伯又云王之三公八命及其出封加一等知爲二伯者據王制天子之老爲左右二伯注云老謂上公是也王制又有八伯卽上文八命之州牧與東西二伯異公羊隱五年傳云天子三公稱公天子三公者何天子之相也天子之相則何以三自陝而東者周公主之自陝而西者召公主之一相處乎內白虎通義封公侯篇云王者所以有二伯者分職而授政欲其亟成也王制曰八伯各以其屬屬於天子之老二人分天下以爲左右曰二伯春秋公羊傳曰自陝以東周公主之自陝以西召公主之不分南北何東方被聖人化日少西方被聖人化日久故分東西使聖人主其難賢者主其易乃俱

致太平也又欲令同有陰陽寒暑之節共法度也案班說東西二伯雖義多牽傳然亦謂二伯以三公爲之與鄭說同云得征五侯九伯者者明不止得專征諸侯也左傳四年傳管仲曰昔召康公命我先君太公曰五侯九伯汝實征之以夾輔周室賈疏引賈服云五等諸侯九州之伯案杜注亦同左傳所云據太公而言太公封齊雖爲侯爵然亦以三公爲二伯故得膺此殊典五侯九伯之說鄭與賈服杜異詩邶風旌丘孔疏引鄭志荅張逸云五侯侯爲州牧也九伯伯爲州伯也一州一牧二伯佐之太公爲王官之伯二人共分陝而治自陝以東當四侯半一侯不可分故言五侯九伯則九人若主五等諸侯九州之伯是天子何異何云夾輔之有也依鄭志說則九州州以一侯爲牧

周禮正義

禮三十四

四二 楚定國子社本

五百四十九

卽上八命之牧每一牧又以二伯佐之九州通有九侯十八伯二伯中分天下每一大伯分統四侯半及小伯九以整數言之故云五侯九伯其說殊迂曲左傳孔疏斥其事無所出校數頗碎非復人情殆非過論竊謂左傳九伯當從賈服杜說爲九州之長王制云千里之外設方伯又云二百一十國以爲州州有伯八州八伯其所謂方伯八伯卽上文作牧及掌交之九牧與左傳九伯亦同左傳伯有九彼云八者王制孔疏引鄭志答張逸云畿內之州不置伯有鄉遂之吏主之雖八九校數少差要之周之州伯卽州牧之通稱殆無疑義鄭以王制爲殷法彼注謂殷之州長曰伯虞夏及周皆曰牧實則周之州牧亦未嘗不稱伯也考之經傳周時止有東西二大伯及一州之牧伯並無

州牧下更立二小伯九州十八伯之說詩旄丘序云責衛伯也
衛伯旄亦爲一州之牧自鄭彼箋誤以周制使伯佐牧謂之州
伯賈孔禮疏牽於其說糾繞殊甚今不悉論鄭司農云長諸侯
爲方伯者爾雅釋詁云伯長也掌客云諸侯長十有再獻注云
諸侯長九命作伯者也公羊莊四年傳云上無天子下無方伯
曲禮云五官之長曰伯是職方鄭彼注云謂爲三公者周禮九
命作伯職主也是伯分主東西者先鄭蓋依彼文謂方伯爲卽
分陝二伯以其東西分主各長一方之諸侯故謂之方伯也然
王制方伯與八州八伯之文相屬是又以方伯爲卽州伯又云
天子使其大夫爲三監監於方伯之國而後鄭聘禮注謂牧有
三監是後鄭亦以彼方伯爲卽牧伯也詩旄丘敘上云責衛伯

下又云青衛不能脩方伯連率之職則詩敘方伯亦指牧伯而言故孔疏云方伯皆謂州長州謂之牧而云方伯者以一州之中爲長故云方伯又左哀十三年傳云王合諸侯則伯帥侯牧以見於王杜注云伯王官伯侯牧方伯此亦謂二伯爲王官伯方伯爲侯牧王制毛詩左氏義與曲禮異後鄭謂殷制八州牧爲八伯周制九州十八伯爲佐牧之伯皆非分陝之伯與先鄭說亦異賈疏謂方伯可及州牧并二伯蓋欲爲曲禮王制及二鄭作調人然非先鄭惜也又案依先鄭此注義則二伯方伯並取長爲稱北堂書鈔設官部引五經異義云王者已有州伯所以復設二伯何欲使述職也何爲二伯乎曰以三公在外稱伯東西分爲二所以稱伯欲抑之也三公臣之最尊者也又以王

命而行天下爲其威故抑之明有所屈迫也許以伯爲屈抑之
稱義殊牽強不及先鄭說之允也

